

# **VOZES de QUE-EMPOSTELA**

## **Nº1, Abril-1996**

### **Voces de Queempostela, a nova publicación do Colectivo CGC**

Velaqui tedes unha nova publicación do Colectivo Gai de Compostela: "Voces de Quempostela". O noso colectivo medra cada vez máis e a información que manexamos e xeramos é maior. Esta follía chega-che, entón, coa intención de te informar de todo o que se está a facer desde o CGC: festas, tertúlias, campañas reivindicativas, xuntanzas, etc... Nace, pois, da necesidade de manter informados a todos os membros do CGC que non viven en Compostela e aos que doutro xeito lles sería moi difícil participar en todas as actividades que programa o colectivo. *Voces de Compostela*, ademais, pretende ir trasmitindo-che o desenvolvimento dos debates ideolóxicos que se xeran dentro do CGC e nos que ti debes participar. E, sobretodo, ten sempre presente que esta publicación é un voceiro máis de todos nós: se queres comunicar algo ao resto dos membros do CGC ou da COFLHEE (novas, suestións, opinións...) non dubides en utilizar esta follía como medio de expresión.

Os días 13 e 14 deste mes celebrou-se en Compostela unha reunión dos grupos integrantes da COFLHEE, Coordenadora de Frentes de Liberación do Estado Español, e da que o CGC é membro. Nas tres sesións da xuntanza abordaron-se os seguintes temas: caso "Army", a Marinsubmisión, as agresións homófobas nas alamedas, a saída de EHGAM Bizkaia da coordinadora e as perspectivas políticas tras os resultados das eleccións do 3M. Destas cuestións informamos-vos nos seguintes apartados. A reunión, ainda que non estivo coroada coa celebración da tradicional festa, foi valorada de xeito moi positivo polas distintas comisións do CGC. O encontro con colectivos gais máis antigos e con más experiencia fai que se aprendan deles estratéxias de traballo moito más eficaces. Ademais, a reunión de Compostela foi decisiva para fixar lemas e liñas de actuación básicas nos actos do próximo 28 de Xuño e na campaña de Marinsubmisión, así como as de actuacións más puntuais.

### **O CGC vai lanzar unha campaña contra as agresións homófobas**

Ante as contínuas agresións que sufren os homosexuais que frecuentan a alameda e máis o Campus Sur compostelán, o CGC está a preparar unha campaña de concienciación a distintos niveis para erradicar o problema. Xa desde hai un mes, o colectivo leva repartindo entre os seus membros e entre os homosexuais que van á alameda uns folletos nos que se dan consellos úteis para actuar en caso de agresión. Ao mesmo tempo, nos folletos fai-se unha chamada á solidariedade de todos os homosexuais cos agredidos. Nestes días han-se enviar cartas ao reitor da USC, Dario Villanueva, e ao alcalde de Compostela, Xerardo Estévez, para acordar unha entrevista con membros do CGC

sobre o tema. Esta dupla reunión fai-se necesaria xa que a seguraza da zona de ligue do Campus Sur é xestionada por unha empresa privada que contrata a Universidade e non pola policía municipal. De non tirarmos nada en limpo destas reunións ou se se negan a receber-nos, o CGC pensa iniciar unha campaña de protesta. Cada membro enviaría unha carta ao reitorado e á alcaldía, recollerían-se sinaturas, levaríase o tema ás comisións municipais e parlamentarias competentes, etc... Se tedes ideas sobre os lemas, suestións para accións concretas ao respecto ou simplemente aportar a vosa opinión sobre o tema, non dubideis en escreber ao apartado de correos ou pasar polo local do CGC nas horas de costume.

## **Sai à rua o nº10 do 'S'homos'**

Tras nove meses de inactividade editorial, este mes sai à rua un novo número da revista *S'homos* do CGC. Cunha portada un tanto polémica (vos xulgaredes), o nº10 da revista aborda o mito gai de San Sebastián, do que é especialista X.M. Buxán. A entrevista fai-se lle precisamente ao Buxán, organizador duns curso no verán pasado sobre Estudos Gais e Lesbianos. O artigo de reflexión toca o tema da comunidade e da identidade gais, unha cuestión que volve ser debatida no noso colectivo especialmente a raiz da saída de EHGAM Bilbao da nosa coordenadora. Ademais, aparece unha lista das revistas, libros e outras publicacións que se gardan celosamente para ti no local do colectivo. Neste número tampouco faltan as seccións de contactos -lembra que anunciar-se no *S'homos* é gratuito-, as de novas breves e a colaboración de debuxantes (Suso Pedreira, Matos) e criadores (Buxán & Mene). Ah! E desta vez a maquetación da revista é totalmente nosa! Enfin, velai o tedes, que vos preste! Lembra que sairá un novo número da revista para o mes de xuño, así que vai mandando canto antes os teus artigos, debuxos e entrevistas ao apdo. de correos do colectivo indicando que van dirixidas á Comisión do Voceiro.

## **Asistentes sociais: o CGC organiza unha campaña de concienciación**

A Comisión de Relacións Exteriores está a organizar unha campaña de concienciación ante a realidade gai entre @s asistentes sociais dos máis dos concellos do noso país. A campaña consiste en enviar ao servizo de asistencia social de cada concello unha carta informativa do que é o noso colectivo, ofrecendo a nosa axuda a todos os gais que recorran a estes servizos municipais. Na carta facilitanse tamén os enderezos dos outros colectivos homosexuais da Galiza e dá-se un toque de atención sobre o feito de que estes servizos sociais deben prestar por igual a todo o mundo toda a axuda posibel. Esta adverténcia dá-se tras saber o CGC de diferentes casos nos que @s asistentes sociais non daban atendido os gais que a el@s recorrian na procura de axuda ou dun punto de referencia para coñecer máis xente na mesma situación. Por último, o colectivo tamén se ofrece para dar charlas e organizar talleres sobre a homosexualidade nos concellos en colaboración con estes servizos sociais

## **Novas tertúlias**

O colectivo seguirá a organizar as suas tertúlias até xuño, que será cando os da comisión que se encarga de organizar-as se den unhas auto-vacacións merecidas, non? Os temas tratados até o de agora foron o da identidade gai, a era postsida, e as relacións dos gais con feministas e lesbianas. Normalmente celebran-se un xoves de cada mes no pub *Bellas Farto* (na Praza de S. Miguel). Os temas das próximas tertúlias (maio e xuño) ainda están sen decidir, se tes algunha suxestión ao respecto, por favor, escribebede á Comisión de Tertúlias utilizando sempre o apdo. 191. Lembra que se queres vir a unha delas pero non tes onde parar en Compostela, non te preocupes, ti avisa-nos que aquí xa che buscamos unha cama onde durmires.

## **Comeza a conta atrás para o 28 de Xuño**

Xa se constituiu a comisión de traballo que se vai encargar de organizar hogano os actos do 28 de Xuño, Dia da Liberación Homosexual. Pensa-se repetir a experiencia do ano pasado de pór unha mesa informativa na rua. Ademais, prepararán-se os actos tradicionais para esta data: unha superfesta e unha concentración reivindicativa en Compostela. Se se che ocorren lemas ou outras posibilidades organizativas escribe-lle á Comisión do 28 de Xuño. Ah! E vai eliminando compromisos para esa data porque ese dia temos que celebrá-lo todos xuntos en Compostela, non si?

## **Marinsubmisión: avíciña-se unha nova campaña**

Na reunión dos colectivos da COFLHÉE decidironse definitivamente os lemas, contidos e directrices da campaña de Marinsubmisión (ou Insubmisión Gai). Con esta campaña, de ámbito estatal, os colectivos defenderán a opción da insubmisión polo feito de ser homosexual e, ademais, espallarán nos media a sua solidariedade cos insubmisos gais. O lema acordado pola coordinadora é: "*Espidas e invencíveis, gais pola insubmisión*". Xa sabes, se che interesa traballar no tema, ou simplemente tes suxestións ou opinións que aportar ao respecto, escribe ao apdo. ou pasa polo local no horario de costume.

Xa sabes...

Escrebe-nos ao Apdo. 191 / CP 15780- Compostela ou vén ver-nos na Rua Entremuros 16 de luns a venres a partir das 20:30h.